

# Mud Volapüka

Nüm 19

12 gustul 2016

---

## Rubrig gramatik

### Dub, dubä

Präpod „dub“ e konyn „dubä“ sinifons „demü ...“, „danädü ...“, „ibä ...“, „kodü ...“:

ememosevob omi **dub** *gol omik (mod omik gola)* = ememosevob omi **bi id ememosevob** *modi omik gola* = ememosevob omi **demü** *gol omik*

nif smeton **dub** *solam* = nif smeton **dubä** *sol litastralon oni* = nif smeton **bi** *sol litastralon oni*

no äkanob slipön **dub** *fen* = no äkanob slipön **bi** *ifenob* = no äkanob slipön **dubä** *ifenob* = no äkanob slipön **ibä** *ifenob*

### Dubo

Ladvärb „dubo“ sinifon „dub kod at ...“:

no isumob jelömi e **dubo** *eluimikob* = no isumob jelömi ed, **as** **prod atosä**, *eluimikob* = no isumob jelömi e, **sekü kod at**, *eluimikob* = no isumob jelömi e **klu** *eluimikob*

## Dö

Präpod „dö“ sinifon „tefü ...“:

agödo ereidob **dö** *stom adelik* (e dubo usumob jelömi) = agödo  
ereidob **tefü (kinik)** *stom adelik (obinon)*

elelilob **dö** *atos* te anu = elelilob **nuni tefü** *atos* te anu = elelilob  
*atosi* te anu

## Dü

Präpod „dü“ sinifon „ünü ...“, „timü ...“, „tüpü ...“ e jonon das jen  
semik jenon *ün(ü) tim jena votik (pö jen votik)*:

eluimikob **dü** *rein* = eluimikob **pö** *rein* = eluimikob **ven(bi)**  
*ereinos* = eluimikob **ünü** *rein*

nif smeton **dü** *florüp* = nif smeton **ön** *florüp* = nif smeton **ün**  
*florüp* = nif smeton **ven** *florüp* **jenon**

## Ebo

Ladvärb „ebo“ sinifon „stediko“, „kuratiko“:

**ebo** ün düp degid = **kuratiko** ün düp degid = ün düp degid **e**  
**minuts ser** = ün 10:00

**ebo** ot = **stediko** leigik

## Efe

Ladvärb „efe“ sinifon „fümiko“ e jonon das jenöfot binon *veratik*,  
*legik nenpläoto*:

ön dinäds nomik vat flodöfon **efe** *ön grads di ‚Celsius‘ ser* = ön  
dinäds nomik vat **ai** flodöfon *ön grads di ‚Celsius‘ ser* = ön dinäds  
nomik vat flodöfon **fümiko** *ön grads di ‚Celsius‘ ser*

## Ekö

Lintelek „ekö“ pagebon ad kasetön vödemi sököl, jänälön küpäli lü  
vödemi sököl:

**ekö!** *katil kiojönik!* = **logolsöd usio**, *katil kiojönik (dabinon  
uso)!*

**ekö**, *(atos binon) buk gudik* = **logolsöd**, *atos binon buk gudik* =  
**mobob ole** *buki at as yeg gudik*

## El

Lartig „el“ pagebon ad jonön vödis nen-Volapükik (mödadilo nemis  
u vödis foginik) if vöd votik patöl fabinon nen kel telplänov mögos  
süikön.

**el** ‚Roma‘ = zif ‚Roma‘ = zif labü nem ‚Roma‘

Noet: ön deklin vöda ledinik pla on lartig „el“ cenon bai deklin.

**els** ‚Beatles‘ (mens fol) äbinoms musiganef Linglänik

**jiel** ‚Maria‘ = **vom** ‚Maria‘ = **vom** labü nem ‚Maria‘

piad ledinik **ela** ‚Roma‘ = piad ledinik **zifa** ‚Roma‘

# Sevols-li, das ... Gineyän



1) Repüblik Gineyän (el ‚République de Guinée‘ Fransänapüko, ‚Gineyän Fransänik‘ büätik) binon län tö Vesüda-Frikop. Papladon tö ziläk ela ‚Lebug Gineyänik‘ kö i papladons: Kveatora-Gineyän (‚Gineyän Spanyänik‘ büätik), Ganän (ziläk ‚Jol goldik‘ büätik äninädöl eli ‚Gineyän Danmarkänik‘, eli ‚Gineyän Nedänik‘, eli ‚Jol goldik Portugänik‘, eli ‚Jol goldik Preusiänik‘ äd eli ‚Gineyän Svedänik‘ kels pibalons ini ‚Jol goldik Britänik‘), Gineyän-Bisauän (‚Gineyän Portugänik‘ büätik), Togolän e dil lofüdik Kamerunäna (‚Gineyän Deutänik‘ büätik). Ad distinön Gineyäni se Gineyän-Bisauän papladöl niliko, pö Frikop nemoys Gineyäni as ‚Gineyän-Conakryän‘ (el ‚Bissau‘

ed el ‚Conakry‘ binon cifazifs Gineyän-Bisauäna e Gineyäna tefädo).

2) Gineyän, to sürfat smalik (dötumanums degmääl zim [0,16%] volaläna), labon dötumanumis 70 laluminamüna e dötumanumis 6,6 ferinamüna voliks. Gineyän binon bal länas deg liegikün bai glunadivs okik (ti sürfat läna binon länedes münas, golda, diamoina, luranina e, mögiko, petrola) ed ottimo binon bal länas deg pöfik vola.

3) Plu dötumanums 90 belödanas Gineyäna gebons te sekis voba okik u canis maketa topik.

4) Koned Britänik goldik el ‚ginit‘ (el ‚guinea‘) pägeböl jü tumyel 19 igeton nemi soik bi päfrapon de gold piramenöl (pimeinöl) de Gineyän (‚Guinea‘ Linglänapüko). Igo nutimo men alik kanon getön dälazöti ad säplanön goldi tö topäd semik.

5) Gineyän binon kolunän balid idagetöl libi de Fransän ün yel 1958 me vögodam valemik.



6) Jü yel 1974 tö Gineyän ‚sanav Yuropik‘ päproibon. Maläds valik päsanons fa syamans.

7) Tö Gineyän büo älabölo züädi nimik liegöfik nutimo nims gretik valik panosükons - leefads, leopars, simiats e rets. Atos distukon löliko töri ini Gineyän.

8) Vat paseveigon de Gineyän ini läns 14 toä das provid belödanis lönik tö län binon vemo krisidik.

9) Bänsin tö Gineyän labon köli redik.

10) Tö cifazif Gineyän el ‚Conakry‘ lektin pagevon ünü düps ömik a del - ün soar ed ün göd gölik. Pö cifs votik lit pakvänon mödadilo sis yanul jü setul. Atos jenon kodü das säsun turnons - säsun sägik e säsun reina ven flumeds fulikons me vat e lektinöps (lektinastajons) vatanämik (vatic) primikons jäfidön. I pö Gineyän stomataib pla stomanunod dabinon bi säsun at turnons ön kurat mö vig. Id el ‚Conakry‘ labon lunoti mö milmetes plu 20 ab vidoti läs milmetes 5, lafadilo nüjutedölo ini mel as tinisul e lafadilo nüjutedölo ini cifalän (kontinän Frikopik). Topam soik e vüt tio balik dese cif (ad tevön plödio de cif) vobedons dakosädastobi laidulik.

11) Stän Gineyäna binon kilkölik äsvo dakosädalitöm - taneds labü köls redik, yelovik e grünik.

12) To jolalien lunotik (milmetes za 20) to el ‚Conakry‘ no dabinons sabajols zifik, bi vat zü zif binon nefrutik ad svimön.

13) Gineyänans binons vemo klinöfik ed ai lavons klotis okik. Sägükons klotis su nuf u siämo su glun ab klot posblibon klinik. Mödadilo te cils binons miotik. Daülans kanons lenlabön kloti voredik e neflifedik ab klinik. Ab pö atos süts binon vemo slimik.




14) Tö Gineyän dugäl julik binon zesüdik e glatik pro cils laböl lifayelis de 7 jü 14. Ab in juls te dötumanums 30 cilas laböl bäldoti tefädik lärnons.



11) Dötumanums 95 toodas tö Gineyän labons bäldoti plu yels 20.



12) Gineyän binon lomalän vifagolana jiel ,Fatmata Fofanah’.



Säkis, küpetis e lofotis aliks ä materis e volanuns nitediks kanols lüsedön lü penedabog «komunan@yandex.ru».